


佛說阿彌陀經略講



佛說阿彌陀經略講



佛說阿彌陀經略講 大綱圖示





佛說阿彌陀經略講

姚秦三藏法師 鳩摩羅什 譯

一、序 分

經文：如是我聞。一時。佛在舍衛國祇樹給孤獨園。

【註】六成就之前，依序是信、聞、時、主、處五成就

經文：與大比丘僧千二百五十人俱。皆是大阿羅漢。眾所
知識。長老舍利弗。摩訶目犍連。摩訶迦葉。摩訶迦旃延。
摩訶俱絺羅。離婆多。周利槃陀伽。難陀。阿難陀。羅睺

羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菟樓駄。如是等諸大弟子。并諸菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。及釋提桓因等。無量諸天大眾俱。

【註】六成就之第六眾成就





二、正宗分

經文：爾時佛告長老舍利弗。從是西方過十萬億佛土。有世界名曰極樂。其土有佛號阿彌陀。今現在說法。

【註】讚極樂淨土：略 讚

經文：舍利弗。彼土何故名為極樂。其國眾生無有眾苦。但受諸樂故名極樂。

【註一】讚極樂淨土：廣 讚

【註二】依 報——(1)極樂名義

經文：又舍利弗。極樂國土。七重欄楯七重羅網七重行樹。皆是四寶周匝圍繞。是故彼國名為極樂。

【註一】讚極樂淨土：廣讚

【註二】依 報——(2)寶欄網樹

經文：又舍利弗。極樂國土有七寶池。八功德水充滿其中。池底純以金沙布地。四邊階道。金銀瑠璃玻瓈合成。上有樓閣。亦以金銀瑠璃玻瓈碑磬赤珠碼瑙而嚴飾之。池中蓮花大如車輪。青色青光。黃色黃光。赤色赤光。白色白光。微妙香潔。舍利弗。極樂國土成就如是功德莊嚴。

【註一】讚極樂淨土：廣讚

【註二】依 報——(3)寶池德水

經文：又舍利弗。彼佛國土常作天樂。黃金為地。晝夜六時雨天曼陀羅華。其土眾生常以清旦。各以衣祴盛眾妙華。



供養他方十萬億佛。即以食時還到本國。飯食經行。舍利弗。極樂國土成就如是功德莊嚴。

【註一】讚極樂淨土：廣讚

【註二】依 報——(4)天樂金地

經文：復次舍利弗。彼國常有種種奇妙雜色之鳥。白鶴孔雀鸚鵡舍利迦陵頻伽共命之鳥。是諸眾鳥。晝夜六時出和雅音。其音演暢五根五力七菩提分八聖道分如是等法。其土眾生聞是音已。皆悉念佛念法念僧。舍利弗。汝勿謂此鳥實是罪報所生。所以者何。彼佛國土無三惡道。

舍利弗。其佛國土尚無惡道之名。何況有實。是諸眾鳥。皆是阿彌陀佛。欲令法音宣流變化所作。舍利弗。彼佛國土。微風吹動諸寶行樹及寶羅網出微妙音。譬如百千種樂

同時俱作。聞是音者自然皆生念佛念法念僧之心。舍利弗。其佛國土成就如是功德莊嚴。

【註一】讚極樂淨土：廣讚

【註二】依 報——(5)鳥音說法

經文：舍利弗。於汝意云何。彼佛何故號阿彌陀。舍利弗。彼佛光明無量。照十方國無所障礙。是故號為阿彌陀。又舍利弗。彼佛壽命。及其人民無量無邊阿僧祇劫。故名阿彌陀。

【註一】讚極樂淨土：廣讚

【註二】正 報——(1)彌陀名號



經文：舍利弗。阿彌陀佛成佛已來於今十劫。

【註一】讚極樂淨土：廣讚

【註二】正 報——(2)成佛時劫

經文：又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾亦復如是。舍利弗。彼佛國土成就如是功德莊嚴。

【註一】讚極樂淨土：廣讚

【註二】正 報——(3)弟子無量

經文：又舍利弗。極樂國土眾生生者皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。

【註一】讚極樂淨土：廣讚

【註二】正報——(4)生皆補處

經文：舍利弗。眾生聞者。應當發願願生彼國。所以者何。得與如是諸上善人俱會一處。

【註一】勸念佛往生：念佛往生

【註二】發願——勸眾願生

經文：舍利弗。不可以少善根福德因緣得生彼國。

【註一】勸念佛往生：念佛往生



【註二】正 因——(1)少善非因

經文：舍利弗。若有善男子善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。

【註一】勸念佛往生：念佛往生

【註二】正 因——(2)念佛正因

經文：其人臨命終時。阿彌陀佛與諸聖眾。現在其前。

【註一】勸念佛往生：念佛往生

【註二】正 果——(1)臨終佛現

經文：是人終時心不顛倒。即得往生阿彌陀佛極樂國土。

【註一】勸念佛往生：念佛往生

【註二】正果——(2)命終往生

經文：舍利弗。我見是利故說此言。若有眾生聞是說者。

應當發願生彼國土。

【註一】勸念佛往生：證誠勸信

【註二】自證

經文：舍利弗。如我今者讚歎阿彌陀佛不可思議功德之利。東方亦有阿閼鞞佛。須彌相佛。大須彌佛。須彌光佛。妙音佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議



功德一切諸佛所護念經。

【註一】勸念佛往生：證誠勸信

【註二】他 證——(1)東方佛證

經文：舍利弗。南方世界有日月燈佛。名聞光佛。大燄肩佛。須彌燈佛。無量精進佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議功德一切諸佛所護念經。

【註一】勸念佛往生：證誠勸信

【註二】他 證——(2)南方佛證

經文：舍利弗。西方世界有無量壽佛。無量相佛。無量幢佛。大光佛。大明佛。寶相佛。淨光佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議功德一切諸佛所護念經。

【註一】勸念佛往生：證誠勸信

【註二】他 證——(3)西方佛證

經文：舍利弗。北方世界有燄肩佛。最勝音佛。難沮佛。日生佛。網明佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議功德一切諸佛所護念經。

【註一】勸念佛往生：證誠勸信

【註二】他 證——(4)北方佛證



經文：舍利弗。下方世界有師子佛。名聞佛。名光佛。達摩佛。法幢佛。持法佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議功德一切諸佛所護念經。

【註一】勸念佛往生：證誠勸信

【註二】他 證——(5)下方佛證

經文：舍利弗。上方世界有梵音佛。宿王佛。香上佛。香光佛。大燄肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恒河沙數諸佛。各於其國出廣長舌相。徧覆三千大千世界說誠實言。汝等眾生。當信是稱讚不可思議功德一切諸佛所護念經。

【註一】勸念佛往生：證誠勸信

【註二】他 證——(6)上方佛證

經文：舍利弗。於汝意云何。何故名為一切諸佛所護念經。舍利弗。若有善男子善女人。聞是經受持者。及聞諸佛名者。是諸善男子善女人。皆為一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語及諸佛所說。

【註一】勸念佛往生：證誠勸信

【註二】勸信——(1)釋經名勸信

經文：舍利弗。若有人已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土若已生。若今生。若當生。是故舍利弗。諸善男子善女人。若有信者。應當發願生彼國土。

【註一】勸念佛往生：證誠勸信



【註二】勸信——(2)明發願益勸信

經文：舍利弗。如我今者稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛能為甚難希有之事。能於娑婆國土五濁惡世。劫濁。見濁。煩惱濁。眾生濁。命濁中。得阿耨多羅三藐三菩提。為諸眾生。說是一切世間難信之法。舍利弗當知。我於五濁惡世。行此難事。得阿耨多羅三藐三菩提。為一切世間。說此難信之法。是為甚難。

【註一】勸念佛往生：證誠勸信

【註二】勸信——(3)釋尊諸佛互讚 嘆難信難說

三、流通分

經文：佛說此經已。舍利弗及諸比丘。一切世間天人阿修羅等。聞佛所說歡喜信受。作禮而去。

佛說阿彌陀經略講





中華淨土宗
彌陀弘願協會





中華淨土宗 彌陀弘願協會

書名：佛說觀無量壽經略講

出版：中華淨土宗彌陀弘願協會

地址：臺北市忠孝東路五段508號4樓

電話：(02)2762-1618



虛空念佛堂
QR-CODE



送行組
QR-CODE



Line 社群
QR-CODE



協會IG
QR-CODE



網址QR-CODE




台北弘願念佛會
Facebook



高雄弘願寺
Facebook



You Tobe
QR-CODE





中華淨土宗 彌陀弘願協會

宗旨：

至心專念阿彌陀佛
信樂極樂深信彌陀
欲生彌陀安樂淨土
乃至十念必生安樂

不共願特色：

重願不虛
衆生稱念
若不生者
不取正覺

